

HOMENAHE NA HIGINIO "FENCHI" JANSSEN



ORANJESTAD(AAN)-- Directiva di R.C.A. a dicidi di duna homenahe na e gran y apreciable Sr. Higinio Jansen, mihor conoci como fenchi.

Un persona dinamico cu a duna y ta dunando casi un cuarto di siglo di su bida na e organisacion menciona.

Den un entrevista cu Shon Pe Krozendijk, relacionista publico di R.C.A., Fenchi pensativamente a relata su historia den R.C.A.

Fenchi a cuminsa hunga futbol na 1941 na edad di 14 aña den junioren di e Tricolornan di Solito.

Fenchi conoci tambe como Pai Jansen ta corda cu e la drenta hunto cu Juancho Kock (Rey di Tumba) y Gabriel Kelly (R.I.P.).

E trio aki a worde busca pa hunga futbol door di Chimbo Croes (R.I.P.) tempo cu Frans Wever tabata presidente di dicho club.

Chimbo e tempo ey tabata encarga cu e equipo di junioren.

A forma e tempo ey asina leuw cu Pai ta corda tambe Chommy Lacle, Juchi Croes, Fa Aponte (R.I.P.), Mai Kelk-

boom (R.I.P.).

Mas despues Juchi Jansen, ruman di pai Jansen, a forma parti di e equipo.

Despues di tres aña e equipo aki a bira Arsenal.

E motibo ta cu R.C.A. tabata tin hopi hungadornan estelar e.o. Chas Loefstok (R.I.P.), Charlie Becker (R.I.P.), Jossy Brokke (R.I.P.), Damian Tromp, Daniel Kelly, Tom Morales, Frans Kelkboom y Nicolaas Pimienta (R.I.P.), etc.

E siguiente aña Arsenal a pasa pa reserva hoofdklasse.

E equiponan e tempo ey den hoofdklasse tabata: Hollandia, R.C.A., Arsenal, Aruba Jrs, Atomic, Volharding, Bubali, Jong Holland, La Fama y San Nicolas Jrs.

Den hoofdklasse e tempo ey R.C.A. a sali campeon, Aruba Jrs sub-campeon, Hollandia na di tercer lugar y Arsenal na di cuatro lugar.

Na final di segundo guerra mundial 1945 durante e Copa Juliana Pa Jansen ta corda algo cu hamas visto a yega di pasa ora cu hollandia a gana e poderoso equipo di R.C.A. pa despues cai venci contra Arsenal cu e score di 2-1.

Arsenal a bay final cu Aruba Jrs y a perde pa penalty.

Pai Jansen a cita algun hungador e tempo ey di Arsenal, na ta: Chommy lacle, Gabriel Kelly (R.I.P.), Fa Aponte (R.I.P.), Juchi Croes, Wechi y Janchi "Lo Exclusivo" Tromp, y Shon Pe Brokke (R.I.P.).

Paisnan bishita tanto cu seleccion di Aruba y despues cu inter ta, Curacao, Suriname, Venezuela, Haiti, Brazil, Costa Rica, Rep. Dominicana, Colombia y Ecuador.

Pai Jansen a duna su opinion tambe encuanto e futbol di antes y awor.

Antes un hungador di futbol ta practica esaki cu amor y dedicacion.

Fuera di e dos factornan aki henter bo famia ta worde envolvi.

Ora bo perde tur hende ta tristo y ora bo gana ta fiesta tin y esaki tabata worde celebra na Deli Bar cu a bira e hangoutplace di hungadornan di futbol.

Na 1946 a bin un fusie entre R.C.A. y Arsenal.

E combinacion aki a sabi di coi campeon di Aruba pa 10 aña consecutivo.

ta pesey e tempo ey un hende no por puntra cual team a gana sino cuanto R.C.A. a gana.

Pai Jansen ta di opinion cu awendia e diverticion nocturno ta obstaculisa e deporte rey y tambe otro ramo di deporte enorme ya cu atletanan ta keda p.e. te 5'or di mainta den un nightclub anto nan mester hunga bala atardi.

Consecuencia ta cu nan prestacionnan ta bao di e nivel normal.

Pai Jansen ta forma parti di bestuur di R.C.A. for di 1970

caminda e la ocupa y ta ocupando puestonan di tesorero y ultimo añanan Vice-presidente.

Fenchi ta conoci y ta worde caractisa como un miembro dedica y honrado.

Di 1971 te cu 1992 Pai tabata e official di R.C.A. cu ta representa e equipo durante e campeonatonan.

Presidentnan cu a laga rastronan fructifero atras pa R.C.A. tabata (ta) John Merryweather, Roland Acosta, Edwin Zichem, Benny Thijsen (actualmente president di R.C.A.), Uddy Hoek y Francis Arends.

Papiando di weganan internacional Pai a bay Haiti cu R.C.A. y na Venezuela tambe cu R.C.A. y akinan hungando contra la Salle, for di mas o menos 40 meter for di goal, Chas Loefstok (R.I.P.) a manda un tanki di un goal for di alcansa di e keeper.

E prensa Venezolano a duna Chas e apodo di "El Tanque Ruso".

Na 1949 Pai a forma parti di e seleccion Arubano cu a bay Suriname.

Seleccion Arubano a gana 3 wega y tabla uno.

Pai Jansen no ta corda e scorenan mas.

Na 1949 tambe tabata tin un triangular Aruba(seleccion), Corsow y Diablos Rojos di Venezuela.

Bus Orman a hunga e tempo pa Venezuela ya anteriormente el a worde contrata pa e equipo ey.

Aruba a gana Diablos Rojos 1-0.

Contra Corsow a surgi un tangana y e wega a keda empatada na 1-1.

Esaki tabata en breve e historia di Pai Jansen.

Sr. Jansen ta casa cu Sra. Victoria Jansen y cual matrimonio a nace 5 yiu, 4 muher y un yiu homber.

Sra. Jansen ta corda cu na Suriname Fenchi a cumpra e renchi di casamento cu a uni nan dos pa 45 aña caba.

Finalisando, Shon Pe a puntra Pai si e ta corda algo agradabel pa cu e equipo di e tricolornan y fenchi a contesta cu den Aruba Nobo cu su Status Aparte, R.C.A. a logra 7 titulo campeonil na 1986.

Lifida A y B, Adspirant mayor, Junior, Division di honor, Inter y e equipo femenino a titula campeon di Aruba.